

**Meeqqat atuarfianni annerni aalisarnek piniarnerlu pillugit siunnersorneqartarnerat qanoq nukittorsarneqarsinnaanersoq iliussissatut pilersaarummik Naalakkersuisut peqquneqarnissaannik Inatsisartut aalajangiiffigisassaattut siunnersuut, aalisarnermik ilinniartitaanermut sulisussarsiortarnerup annertusarneqarnissaa kiisalu Kalaallit Nunaata imarsiornerup iluani piginnaasaasa nukittorsarneqarnissaat siunertaralugu. Siunnersuut EM2026-imut tunniunneqassaaq.**  
(Inatsisartunut ilaasortaq Jens Napätök', Naleraq)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermerneqarnera**

Aalisarnermik ilinniartitaanermut ilinniartussarsiortarnerup annertusarneqarnissaa kiisalu Kalaallit Nunaata imarsiornerup iluani piginnaasaat nukittorsarneqarnissaat siunertaralugu meeqqat atuarfianni klassini angajullerni atuartut siunnersorneqartarnerat qanoq nukittorsarneqarsinnaanersoq pillugu iliussissatut pilersaarummik suliaqarnissamik Naalakkersuisut peqquneqarnissaannik Inatsisartut aalajangiiffigisassaattut siunnersuummut Naalakkersuisut sinnerlugit qujavunga.

Nunatta aningaasaqarneranut siunissamilu ineriartornissaanut imarsiornermik inuussutissarsiutit pingaaruteqarlunnarnerannik naliliineq Naalakkersuisut isumaqatigillunnarpat. Siunnersuutip siunertaanut atasumik suliamik aallartitsisoqareernikuunera Naalakkersuisut ilisimatitsissutigisavaat. Ilinniartitsinermit Periusissiaq 2024 – 2030-mut aamma Attassiinnarnissamut Ineriartortitsinissamullu Pilersaarut 2-mut suliamut atatillugu 10. klassip kingornatigut ilinniakkat tunngaviusut inerisarneqarnerat Naalakkersuisut aallartinnikuuaat, tassanilu imarsiornermik immikkoortortaq siunniussatut pingaarnertut sammineqarluni. Inuusuttut siusissukkut, nunatsinni inuussutissarsiutit pingaarnersaat tikivillugu ilisimatinneqartarnissaat, minnerunngitsumillu aalisarnermik imarsiornermillu inuussutissarsiortarnermut immikkoortumut inuusuttunut soqutiginnittunut ersarissumik ilinniarnissamut aqqutissat ersarissarnissaat siunertaavoq.

Meeqqat atuarfianni siunnersuisarnerup nukittorsarneqarsinnaaneranik pisariaqartitsisoqarnera Naalakkersuisut aamma isumaqatigaat. Meeqqat atuarfianni aamma inuusuttut ilinniartitit ikaarsaariarnermi –angajullerni atuartut ilinniagaqarnissamut aqqutissiuunneqartarnerat angusaqarfiulluaqqullugu pitsanngorsarniarlugulu AQQUT – Nunatsinni Aqqutissiuussisarfik suleqatigalugu tunngaviusumik ilinniakkat inerisarnerat suleqatigiissutigineqarpoq. Atuartut ilinniakkamik toqqaanissaat pitsaasumik tunngavissinniarlugit, tunngaviusumik ilinniagaq suliarineqartaq immikkut pingaartillugu siunnersuisarnek ingerlanneqassaaq.

Iliussissatut pilersaarut pillugu piffissaliinermut tunngatillugu UKA2026-mi saqqummiinissaq ilisimasatigut amigartumik tunngaveqarsinnaanissaa Naalakkersuisut nalilerpat. Aqqutissiuussinerup nukittorsarneqarnissaata aamma tunngaviusumik ilinniakkap nutaap imarsiornermut ilinniakkanik ilaqartussap inerisarneqarnissaa meeqqat atuarfiisa, aqqutissiuussisarfiup, inuussutissarsiutinik ilinniartitsinerit aamma suliffeqarfik akornanni peqqissaartumik ataqatigiissaarinissamik pisariaqartitsivoq, taamaattumillu januar 2027-mi suliap naammassineqarnissaa aatsaat naatsorsuutigineqarpoq.

Taamatut tunngavilersuillutik Naalakkersuisut allannguutissatut siunnersuutigaat:  
*"Tunngaviusumik ilinniakkanik suliaqarnermut atatillugu meeqqat atuarfianni angajullerni atuartunut iliuusissatut pilersaarummik Naalakkersuisut suliaqarnissamut peqquneqarput - taamaaliornikkut aalisarnermik ilinniarfinni ilinnialersussat amerlisarniarlugit aammalu Kalaallit Nunaanni imarsiornermik inuussutissarsiornermi piginnaasat nukittorsarneqarniassammata. Iliuusissatut pilersaarut UPA2027-mi saqqummiunneqassaaq".*

Tunngaviusumik ilinniakkami suliarineqartumi imarsiornermik ilinniakkat qajannaatsumik tunngavissinneqarnissaat, AQQUT-ip aamma meeqqat atuarfiisa qanittumik oqaloqatigiinnissaasa qulakkeerneqarnissaa, kiisalu inerisaanermik suliap naammassineqarnissaa suliamut piffissaliussap tamatuma periarfissippaa.

Siunnersuummi siunertaasut Naalakkersuisut taamatut taperserpaat. Iliuusissatut siunnersuutip suliarilluarneqarnissaa, atasinnaassuseqarnissaa aamma inuusuttunut, inuussutissarsiutinut nunattalu siunissaanut iluaqutaanissaa UPA 2027-mi saqqummiussisussanngornikkut Naalakkersuisut qulakkeersinnaanngorpaat.